

საქართველოს ტექნიკური უნივერსიტეტის

აკადემიური საბჭოს

2017 წლის 19 სექტემბრის

დადგენილება №2563

სტუ-ის სტუდენტთა კონტინგენტის ფორმირებისა
და მობილობის ინსტრუქციაში ცვლილებების
შეტანის შესახებ

საქართველოს ტექნიკური უნივერსიტეტის აკადემიური საბჭო ადგენს:

„უმაღლესი განათლების შესახებ“ საქართველოს კანონის 21-ე მუხლის პირველი პუნქტის „კ“ და „ს“ ქვეპუნქტებისა და საქართველოს ზოგადი ადმინისტრაციული კოდექსის 63-ე მუხლის შესაბამისად, სტუ-ის აკადემიური საბჭოს 2011 წლის 17 ივნისის №482 დადგენილებით დამტკიცებულ „სტუ-ის სტუდენტთა კონტინგენტის ფორმირებისა და მობილობის ინსტრუქციაში“ (შემდეგში ინსტრუქცია) შეტანილ იქნეს შემდეგი ცვლილებები:

1. ინსტრუქციას მე-7 მუხლის შემდეგ დამატოს მე-7¹ მუხლი შემდეგი რედაქციით:

„მუხლი 7¹. სასწავლო პროცესში ინკლუზიური განათლების ინტეგრირებისა და ინკლუზიური სასწავლო გარემოს შექმნის მექანიზმები

1. სტუ ახორციელებს ინკლუზიური განათლების დანერგვას, რაც გულისხმობს სპეციალური საგანმანათლებლო საჭიროების მქონე პროფესიულ სტუდენტთა ჩართვას სასწავლო პროცესში და მათთვის შესაბამისი სასწავლო გარემოს შექმნის უზრუნველყოფას;
2. სპეციალური საგანმანათლებლო საჭიროების მქონე პროფესიული სტუდენტისთვის სტუ-ის მიერ შემუშავდება ინდივიდუალური სასწავლო გეგმა, რომელიც დაეფუძნება პროფესიულ საგანმანათლებლო პროგრამას/მოდულს და წარმოადგენს მის მოდიფიკაციას (მისაღწევი სწავლის შედეგების თვისობრივ ან რაოდენობრივ ცვლილებას) და/ან აკომოდაციას (სწავლებისა და შეფასების მიდგომებში ცვლილებას მისაღწევი სწავლის შედეგების ცვლილების გარეშე) და, შესაბამისად, დააზუსტებს სპეციალური საგანმანათლებლო საჭიროების მქონე სტუდენტისთვის საჭირო დამატებით საგანმანათლებლო მომსახურებას;
3. ინდივიდუალური სასწავლო გეგმა გამოყენებული იქნება როგორც სახელმძღვანელო სპეციალური საგანმანათლებლო საჭიროების მქონე პროფესიული სტუდენტის საგანმანათლებლო პროცესის განხორციელებისთვის. ინდივიდუალური სასწავლო გეგმის ფარგლებში სპეციალური საგანმანათლებლო საჭიროების მქონე პროფესიული სტუდენტის მიმდინარე შეფასება განხორციელდება ინდივიდუალურად, განსაზღვრულ მისაღწევ სწავლის შედეგებთან, ხოლო საბოლოო შეფასება და კრედიტების მინიჭება – საგანმანათლებლო პროგრამის/მოდულის მოთხოვნებთან მიმართებით;
4. სპეციალური საგანმანათლებლო საჭიროების მქონე პროფესიული სტუდენტთათვის სტუ უზრუნველყოფს სასწავლებლის ფიზიკური გარემოს ხელმისაწვდომობას შესაბამისი ინფრასტრუქტურის გამართვის გზით.“.

2. ინსტრუქციის დანართი №3 ჩამოყალიბდეს შემდეგი რედაქციით:

„დანართი 3

**პროფესიული სტუდენტის მობილობა და მიღებული
განათლების აღიარება**

მუხლი 1. პროფესიული სტუდენტის მობილობა

1. საქართველოს ტექნიკურ უნივერსიტეტში პროფესიულ სტუდენტთა მობილობის ადმინისტრირებას ახორციელებს და მობილობის საკითხებზე საბოლოო გადაწყვეტილებას იღებს სტუ-ის რექტორი;
2. სწავლების დეპარტამენტის უფროსი ფაკულტეტების მოთხოვნათა საფუძველზე რექტორს წარუდგენს წინადადებას მობილობით პროფესიული სტუდენტების მისაღები ადგილების რაოდენობის განსაზღვრაზე, იმ პროგრამების მითითებით, რომლებზეც მიზანშეწონილია პროფესიულ სტუდენტთა მიღება. პროფესიული სტუდენტების მიღებისათვის თავისუფალი ადგილების რაოდენობა, მობილობის მსურველი პირის მიერ წარმოსადგენი დოკუმენტაციის ჩამონათვალი, აგრეთვე განცხადებების მიღებისა და განხილვის ვადები მტკიცდება სტუ-ის რექტორის ბრძანებით, რომელიც განთავსდება უნივერსიტეტის ვებგვერდზე;
3. მობილობის უფლება აქვს ნებისმიერი საგანმანათლებლო დაწესებულების პროფესიულ სტუდენტს, რომლის ჩარიცხვა განხორციელდა კანონმდებლობით დადგენილი წესით და მობილობის დროისათვის წარმოადგენს კოლეჯის ან სხვა საგანმანათლებლო დაწესებულების პროფესიულ სტუდენტს;
4. მობილობის წესით ჩარიცხვის მსურველი პროფესიული სტუდენტი ვალდებულია დადგენილ ვადაში სტუ-ში შეიტანოს შესაბამისი განცხადება, აგრეთვე წარადგინოს ბრძანებით განსაზღვრული დოკუმენტაცია;
5. მოთხოვნილი დოკუმენტაციის არასრულად წარმოდგენა შესაძლებელია გახდეს პირის მობილობის წესით ჩარიცხვაზე უარის თქმის საფუძველი;
6. მობილობა უნდა განხორციელდეს მხოლოდ ერთი და იმავე საფეხურის პროფესიულ საგანმანათლებლო პროგრამაზე;
7. მობილობა ჩარჩოდოკუმენტის საფუძველზე შექმნილ პროფესიულ საგანმანათლებლო პროგრამაზე სწავლის შემთხვევაში უნდა განხორციელდეს მხოლოდ ჩარჩოდოკუმენტის საფუძველზე შექმნილ პროფესიულ საგანმანათლებლო პროგრამაზე;
8. პროფესიული სტუდენტის მობილობით გადმოყვანა და ჩარიცხვა ფორმდება სტუ-ის რექტორის ბრძანებით;
9. სტუ უფლებამოსილია შესთავაზოს სტუდენტს მობილობა შემდეგი გარემოებების წარმოშობისას:
 - ა) სწავლის მიმდინარეობისას ჯგუფში დარჩა სტუდენტთა არასაკმარისი რაოდენობა და სტუ-ს არ ჰყავს ამავე სპეციალობაში სხვა ჯგუფი;
 - ბ) გაუქმდა პროფესიული საგანმანათლებლო პროგრამა.
10. ამ მუხლის მე-9 პუნქტში აღნიშნული გარემოების დადგომისას, სტუ უფლებამოსილია, შესთავაზოს სტუდენტს მობილობა უნივერსიტეტში არსებულ სხვა, მონათესავე პროფესიულ პროგრამაზე.
11. იმ შემთხვევაში თუ სტუ-ს არ გააჩნია ამ მუხლის მე-10 პუნქტით განსაზღვრული პროგრამა, სტუდენტს შესთავაზებს გარე მობილობას, რათა მან დაასრულოს სწავლა სხვა საგანმანათლებლო დაწესებულებაში, რომელიც ახორციელებს მონათესავე ან/და იმავე საფეხურის პროფესიულ საგანმანათლებლო პროგრამებს, ამ დაწესებულებასა და სტუ-ს შორის გაფორმებული მემორანდუმის/ხელშეკრულების საფუძველზე.

მუხლი 2. მიღებული განათლების აღიარება

1. პროფესიულ საგანმანათლებლო პროგრამებთან პროფესიული საგანმანათლებლო პროგრამის/ჩარჩოდოკუმენტის საფუძველზე შექმნილი პროფესიული საგანმანათლებლო პროგრამის მობილობის მსურველი პირის მიერ სხვა პროფესიული საგანმანათლებლო პროგრამის ფარგლებში მიღებული სწავლის შედეგების თავსებადობას ადგენს და გადაწყვეტილებას შესაბამისი კრედიტების აღიარების შესახებ იღებს საფაკულტეტო კომისია;
2. აღიარებას ექვემდებარება საგანმანათლებლო დაწესებულების იმ პროგრამის ფარგლებში მიღებული კრედიტები, რომელზე ჩარიცხვა და სწავლება განხორციელდა კანონმდებლობით დადგენილი წესით;
3. შინაარსობრივი შესწავლის შედეგად შესაძლებელია დადგინდეს პროფესიული სტუდენტის მიერ გავლილი და სტუ-ის პროფესიული საგანმანათლებლო პროგრამით გათვალისწინებული სასწავლო კურსების შესაბამისობა მათ სახელწოდებებში არსებული განსხვავების მიუხედავად;

4. შინაარსობრივი შესწავლის შედეგად შესაძლებელია დადგინდეს პროფესიული სტუდენტის მიერ გავლილი და სტუ-ის პროფესიული საგანმანათლებლო პროგრამის ჩარჩო დოკუმენტის საფუძველზე შექმნილი პროფესიული საგანმანათლებლო პროგრამის მოდულების შესაბამისობა;
5. საფაკულტეტო კომისია უფლებამოსილია, გასაუბრების ან/და გამოცდის საფუძველზე დაადგინოს მობილობის მსურველი პირის მიერ მიღებული პროფესიული განათლების თავსებადობა პროფესიულ საგანმანათლებლო პროგრამასთან/ჩარჩოდოკუმენტის საფუძველზე შექმნილ პროფესიულ საგანმანათლებლო პროგრამასთან;
6. პროფესიული საგანმანათლებლო პროგრამის კრედიტების აღიარება გულისხმობს პროფესიული სტუდენტის მიერ სხვა ავტორიზებული პროფესიული საგანმანათლებლო პროგრამის/ჩარჩოდოკუმენტის საფუძველზე შექმნილი პროფესიული საგანმანათლებლო პროგრამის ფარგლებში მიღებული კრედიტების და სწავლების შედეგების შედარებას სტუ-ის იმ პროფესიულ საგანმანათლებლო პროგრამის/ჩარჩოდოკუმენტის საფუძველზე შექმნილ პროფესიულ საგანმანათლებლო პროგრამასთან, რაზეც პირს სურს სწავლის გაგრძელება ან განახლება;
7. სტუ-ის მიერ პროფესიული საგანმანათლებლო პროგრამის/ჩარჩოდოკუმენტის საფუძველზე შექმნილი პროფესიული საგანმანათლებლო პროგრამის აღიარებისათვის შესაძლებელია მოთხოვნილ იქნეს შესაბამისი პროფესიული საგანმანათლებლო პროგრამა (სასწავლო კურსი/მოდული, სილაბუსი/კალენდარული გეგმა ან შეფასების სტანდარტის დაკმაყოფილება), დამატებით სხვა ინფორმაცია, რომლის წარდგენის ვალდებულება ეკისრება პროფესიულ სტუდენტს;
8. პროფესიული სტუდენტის მიერ გავლილი საგნების/მოდულების და მათი სწავლის შედეგების შინაარსობრივი კვლევის შედეგად შესაძლებელია დადგინდეს იდენტურობა პროფესიული სტუდენტის მიერ განვლილ დისციპლინასა და სტუ-ის პროფესიული საგანმანათლებლო პროგრამით გათვალისწინებულ სხვა დისციპლინას შორის.
9. პროგრამის კრედიტების აღიარების შესახებ გადაწყვეტილებაში დეტალურად მიეთითება შესაბამისობები და შეუსაბამობები პროფესიული სტუდენტის მიერ გავლილ პროგრამასა და სტუ-ის პროფესიულ საგანმანათლებლო პროგრამას შორის;
10. საფაკულტეტო კომისიის მიერ მიღებული დასკვნა წარედგინება სტუ-ის რექტორს, რომელიც იღებს საბოლოო გადაწყვეტილებას;
11. სტუ-ის რექტორის მიერ გამოცემულ ადმინისტრაციულ-სამართლებრივ აქტში სტუდენტის მიერ სხვა საგანმანათლებლო დაწესებულებაში მიღებული განათლების აღიარების შესახებ მიეთითება სტუდენტის მიერ გავლილი საგანმანათლებლო პროგრამის შესაბამისობა სტუ-ის პროგრამასთან და ასევე, აღიარებული კრედიტების რაოდენობა;
12. დადგენილება დაინტერესებული პირის მიერ შეიძლება გასაჩივრდეს კანონმდებლობით დადგენილი წესით ძალაში შესვლის დღიდან 1 თვის ვადაში ქ. თბილისის საქალაქო სასამართლოს ადმინისტრაციულ საქმეთა კოლეგიაში (მისამართი: ქ. თბილისი, დავით აღმაშენებლის ხეივანი, მე-12 კილომეტრი, №6).
13. დადგენილება ძალაში შედის გამოქვეყნებისთანავე.

აკადემიური საბჭოს თავმჯდომარე

არჩილ ფრანგიშვილი

აკადემიური საბჭოს მდივანი

გიორგი სალუქვაძე